

Broj protokola:
04.06.2012.

SAOPĆENJE ZA MEDIJE

Centar za kulturu dijaloga je 02. i 03.06.2012. u Hotelu „Grand“ u Sarajevu organizirao Seminar i interaktivnu radionicu „Kroz debatu saznajmo više o HIV-u“, čiju implementaciju je podržao UNDP.

Na Seminaru je učestvovalo 111 srednjoškolaca, učenika osnovnih škola, profesora i nastavnika iz cijele BiH. Prva aktivnost seminara je bila javna debata na tezu „U javnosti treba pričati o stigmati i diskriminaciji ljudi koji žive sa HIV-om“. Tokom javne debate, mladi srednjoškolci iz Sarajeva, Brčkog, Srpsca, Pala, Tuzle i Mostara su prezentirali svoja znanja o temi debate i prisutne upoznali o diskriminatornim aspektima bh. društva kada se razgovara o HIV-u. Učesnici su zaključili da se u BiH ne daje veliki značaj temi HIV/AIDS-a o kojoj svi svjetski mediji skoro pa svakodnevno govore. **Zbog toga je neophodno o temi govoriti stalno kako bi javnost BiH bila senzibilizirana za probleme sa kojima se HIV pozitivne osobe i oboljeli od AIDS-a svakodnevno suočavaju.**

Nakon diskusije, učesnici su, podijeljeni u 4 skupine i prisustvovali različitim radionicama, kako bi na što inovativniji način usvojili znanja o HIV-u, AIDS-u, istraživanju tema, ali i lobiranju za prava zaraženih i oboljelih. Analizirajući temu sa različitih aspekata tokom seminara učesnici su zaključili sljedeće:

- U javnosti u BiH se nedovoljno govori o HIV-u i AIDS-u, i to bi mogao biti osnovni razlog slabe educiranosti javnosti o temi, kao i postojanja brojnih predrasuda prema zaraženima i oboljelima.
- U školama u BiH, ova ozbiljna tema je prikazana vrlo šturo i učenici, na osnovu znanja iz škole ne mogu znati sve opasnosti koje sa sobom nosi HIV, ali ne mogu ni znati da se HIV ne prenosi zagrljajem
- Učenicima je potrebno dati da istražuju ovu kompleksnu temu, jer na taj način lakše usvajaju znanja i postaju ljudi koji svoje znanje mogu lako prenijeti vršnjacima čime se povećava broj osoba koje su usvojile znanja o opakom virusu i bolesti
- Predrasude o zaraženima i oboljelima su više nego prisutne u bh. društvu, i to je jedan od razlog zbog čega osobe koje sumnjaju na infekciju HIV-om odlažu obavljanje testa za utvrđivanje HIV statusa

Poseban akcenat tokom Seminara je bio stavljen na kreiranje planova, na nivou lokalne zajednice, odnosno škole za prevazilaženje i smanjenje predrasuda prema zaraženima i oboljelima. Neki od planova uključuju:

- Edukaciju dijela učenika škole o HIV-u, koji bi postali vršnjački edukatori i u školi bi na časovima odjeljske zajednice educirali svoje vršnjake. Na taj način bi nekoliko učenika-edukatora vrlo lako i efikasno moglo prenijeti znanja učenicima cijele škole.
- Organiziranje „Dana otvorenog razgovora o HIV-u“ u školi tokom kojeg bi učenici škole posjetiteljima kroz prezentacije i otvorenu diskusiju prezentirali osnovne činjenice o temi.
- Dodatnu edukaciju profesora biologije koji bi tokom časova o spolno prenosivim bolestima posebnu pažnju posvetili ovoj temi.
- Edukaciju svih profesora škole o HIV-u/AIDS-u koji bi tokom časova odjeljske zajednice učenike educirali o HIV-u i AIDS-u.

Kroz zajednički rad učesnici su stekli znanja o:

- Pravilnom istraživanju teme HIV/AIDS-a
- Kritičkom osvrtu na činjenice dobivene tokom istraživanja
- Prezentiranju činjenica dobivenih nakon istraživanja
- Javnom govoru i načinima na koje kroz javni govor slušaoce mogu senzibilizirati za temu
- Kreiranju planova akcije na nivou lokalne zajednice kroz čiju implementaciju je moguće smanjiti problem HIV/AIDS-a

Zaključak učesnika nakon seminara: BiH se mora pridružiti globalnoj kampanji za smanjenje broja oboljelih ali i za smanjenje stigme i predrasuda sa kojima se ove skupine svakodnevno suočavaju. Samo otvorenim dijalogom i edukacijom javnosti moguće je postići da bh. društvo postane društvo koje neće imati diskriminatorski stav prema onima kojima je potrebna pomoć i razumijevanje društva, a ne odbacivanje!